

आकाशवाणी

1. छत्तीसगढ़ च अज्ज सुरक्षाबलें कन्नै होए दे इक टाकरे च 27 नक्सली मारे गेन।
2. भारत नै ऑपेशन सिंदूर मगरा पाकिस्तान समर्थित आतंकवाद दा बेनकाब करने लेई कूटनीतिक आउटरीच प्रोग्राम दी शुरूआत कीती ऐ।
3. भारत नै खुजदार घटना बारै पाकिस्तान दे बेबुनियाद इल्जाम खारिज करी दिते न।
4. भारत नै संयुक्त राष्ट्र गी दस्सेआ ऐ जे आतंकवाद दा मुकाबला करना ते समुंद्री सुरक्षा गी यकीनी बनाना भारत दी राश्ट्री सुरक्षा ते आर्थिक हितें लेई बड़ा महत्वै आहला ऐ।
5. ब्रिटेन नै गजा च बने दे हालात करी इसाइजल कन्नै बपार सरबन्धी गल्लबात गी मुअत्तल करी दित्ता ऐ। इसाइल नै आखेआ ऐ जे ओह बाहरी दबास दे करी सुरक्षा नीतियें च बदलाव नेई करोग।
6. मौसम सरबन्धी मैहकमे नै इस म्हीने दी 26 तरीक तोड़ी मुल्खै दे मते सारे हिस्सें च भारी बरखा पौने दी पेशगोई कीती ऐ।

<><><><><><>

Chattisgarh-Encounter

छत्तीसगढ़ दे नारायणपुर जिले दे अबुजमाड़ इलाके च अज्ज सुरक्षाबलें कन्नै होए दे टाकरे च 27एं नक्सलियें गी मारी मकाया गेआ ऐ। इस टाकरे च नक्सलियें दा इक सिरे दा लीडर बी मारेआ गेआ ऐ। सुरक्षाबलें घटना आहली थाहरा सवां मारे गेदे नक्सलियें दी लोथें गी बरामद करी लैता ऐ। कार्रवाई दौरान इक्क सुरक्षाकर्मी शहीद होई गेआ ऐ। अबुजमाड़ इलाके च नक्सलियें दे इक सिरे दे लीडर ते बड़ी मती गिनतरी च माओवादियें दी मौजूदगी दी सूह थहोने मगरा नारायणपुर, दंतोवाड़ा, बीजापुर ते कोंडागांव जिलें दी जिला रिजर्व गार्ड दी टीमें सांझी कार्रवाई कीती। अज्ज बड़डलै सवां गै नक्सलियें ते सुरक्षाबलें बश्कार टाकरा चला करदा हा। घटना आहली थाहरा सवां बड़ी मती गिनतरी च थैआर बरामद कीते गे।

<><><><><><>

Home-Minister Naxal

केंद्री गृह मंत्री अमित शाह होरें माओवादियें खलाफ छत्तीसगढ़ च अज्ज कीती गेदी कार्रवाई गी नक्सलवाद गी खत्म करने दी लड़ाई च इक्क बड़डी उपलब्धि करार दित्ता ऐ। री शाह होरें

इक्क सोशल मीडिया पोस्ट च आखेआ जे नारायणपुर च कीती गेदी कार्रवाई च सुरक्षाबलें नमबाला केशव राय उर्फ बसवराजू समेत 27 खतरनाक माओवादियें गी मारी मकाया ऐ। केशव सीपीआई माओवादी दा महासचिव, सिरेआ दा लीडर ते नक्सली आंदोलन दी रीढ़ दी हडडी हा। गृह मंत्री होरें आखेआ जे नक्सलवाल खलाफ देश दी लड़ाई दे 3 दहाकें च पैहली बारी कुसै महासचिव स्तरै दे मुख नक्सली लीडर गी सुरक्षाबलें मारी मकाया ऐ। उनें इस बड्डी कामयाबी लेई सुरक्षाबलें ते एजेंसियें दी तरीफ कीती ऐ। गृह मंत्री होरें दस्सेआ जे ऑप्रेसन ब्लैक फारेस्ट दे पूरा होने मगरा छत्तीसगढ़, तेलंगाना ते महाराष्ट्र च 54एं नक्सलियें गी गिरफ्तार कीता गेआ ऐ ते 84 नक्सलियें आत्मसमर्पण करी दिता ऐ। उनें आखेआ जे मोदी सरकार नै मार्च 2026 कोला पैहलें नक्सलवाद गी खत्म करने दा धेइया कीते दा ऐ।

<><><><><><>

PM-Naxalism

प्रधानमंत्री नरेंद्र मोदी होरें अज्ज छत्तीसगढ़ च माओवादियें खलाफ कीती गेदी कार्रवाई गी मुखे दे सुरक्षाबलें दी कामयाबी ते इसी फख्र मसूस करने आहला दस्सेआ ऐ। श्री मोदी होरें इक्क सोशल मीडिया पोस्ट च आखेआ जे सरकार माओवाद गी खत्म करने लेई ते मुखे दे लोकें दी तरक्की ते अमन-शांति आहला जीवन यकीनी बनाने लेई बचने बज्झी दी ऐ।

<><><><><><>

Amrit-Bharat Stations

अज्जै कल्लै दी स्हूलतें कन्नै लैस 103 अमृत भारत स्टेशनें दा कल होने आहले उद्घाटन लेई सब्बै तैयारियां पूरी करी लैती गेइयां न। प्रधानमंत्री नरेंद्र मोदी होर कल राजस्थान दे बीकानेर सवां इनें स्टेशनें दा उद्घाटन करंगनं अमृत भारत स्टेशन योजना तैहत इनें स्टेशनें दा दर्जा बदाया गेआ ऐ ते इनेंगी परतियै विकसित कीता गेआ ऐ। प्रधानमंत्री होर 26 जहार करोड़ रपे दी लागत आहिलियें बक्ख-बक्ख विकास परियोजनाएं गी राष्ट्र गी समर्पित करडन। इनें परियोजनाएं च रेलवे, शिड़क, उर्जा, पानी ते परती-परतियै बरतौने आहली उर्जा सरबंधी क्षेत्र दियां परियोजनां शामिल न।

<><><><><><>

PM-Amrit Stations

प्रधानमंत्री नरेंद्र मोदी होरें आखेआ ऐ जे कल भारत दे रेलवे सरबंधी बुनियादी ढांचे लेई इक ऐतिहासिक ध्याड़ा ऐ। इक सोशल मीडिया पोस्ट च उनें आखेआ जे अमृत स्टेशनें कन्नै आराम ते मेल संपर्क च बाददा होग ते कन्नै मुखे दी शानदार संस्कृति दा प्रदर्शन होग। प्रधानमंत्री

मोदी होर कल अज्जै-कललै दी स्हूलतें कन्नै लैस 103 अमृत भारत स्टेशनें दा उद्घाटन करडन।

<><><><><><>

Delegation-Jha

JD (U) दे सांसद संजय कुमार झा हुंदी अगुवाई च इक सर्वदलीय प्रतिनिधिमंडल अज्ज आंप्रेशन सिंदूर मगरा भारत दी कूटनीतिक आउटरीच ते पाकिस्तान आसेआ प्रायोजित आतंकवाद गी बेनकाब करने लेई 5एं मुखें दे दौरै उप्पर रवाना होई गेआ। एह प्रतिनिधिमंडल इंडोनेशिया, मलेशिया, द रिपब्लिक ऑफ कोरिया, जपान ते सिंगापुर दा दौरा लाग तां जे आतंकवाद कन्नै हर चाल्ली कन्नै निब्बड़ने लेई देसै दे दृढ़ रवैये ते पक्के धेड़यै गी स्हेई तरीके कन्नै दस्सेआ जाई सकै।

<><><><><><>

Pakistan-Khujdar Incident

पाकिस्तान च ब्लोचिस्तान सूबे दे खुजदार कस्बे च इक स्कूली बस पर होए दे बम हमले च 3 बच्चें समेत घट्टोघट्ट 5 जनें दी मौत होई गई ऐ ते कई होर घायल होई गेन। मुकामी समाचार माध्यमें दी खबरें मूजब एह बस तकरीबन 40एं स्कूली बच्चें गी लेड़यै जा करदी ही, दूर-दरेडे कस्बे खुजदार च लंगघदे बेल्लै बस च धमाका होई गेआ। एल्लै तोड़ी कुसै बी ग्रुप नै एहदी जिम्मेदारी नेई लैती ऐ।

<><><><><><>

PM-MKB

प्रधानमंत्री नरेन्द्र मोदी होर 25 मेई गी आकाशवाणी पर प्रसारित होने आहले अपने महावार रेडियो कार्यक्रम मन की बात राए देश विदेश च रोहने आहले लोकें कन्ने अपने विचार सांझे करडन। एह इस प्रोग्राम दी 122मीं कड़ी होग। लोक अपने विचार ते सुझा टोल फ्री नम्बर 1800-11-7800 पर भेजी सकदे न। एदे अलावा लोक अपने सुझा ते विचार नरेन्द्र मोदी एप ते माई गोव ओपन फोरम पर बी भेजी सकदे न। इन्दे चा चुने गेदे किश सुझाएं गी प्रधानमंत्री होर अपने कार्यक्रम च शामिल करडन। मन की बात लेई विचार ते सुझा भेजेने दी अखीरी तरीक 23 मेई ऐ।

<><><><><><>

High Alert Fake Report

सरकार नै बकख-बकख सोशल मीडिया चैनलें पर पाई गेदी उनें पोस्टें गी खारिज करी दिता ऐ जेदे च एह दावा कीता गेदा हा जे केंद्र सरकार नै 29 मई कोला लेइयै 2 जून बश्कार तापमान 55 डिग्री सेल्सियस तोड़ी बदने दी शंका गी लेइयै इक्क हाई अलर्ट जारी कीते दा ऐ। प्रेस सूचना ब्यूरो दी तथ्यें गी जांचने आहली इकाई नै एह गल्ल साफ करी दिती ऐ जे सरकार नै इस चाल्ली दी कोई अधिसूचना जारी नेई कीती दी ऐ। नागरिकें गी एब्बी निर्देश दिते गेन जे ओह भारत दे मौसम सरबन्धी मैहकमें दी अधिकारिक वेबसाइट गी दिक्खन।

<><><><><><>

UN-Rep.

संयुक्त राष्ट्र च भारत दे स्थायी प्रतिनिधि पी. हरीश होरें सुरक्षा कौंसल गी दस्सेआ ऐ जे आतंकवाद दा मुकाबला करने ते समुंद्री सुरक्षा गी यकीनी बनाना भारत दी राष्ट्रीय सुरक्षा ते आर्थिक हितें लेई बड़ा महत्वे आहला ऐ। समुंद्री सुरक्षा बारे चर्चा च श्री हरीश होरें भारत दी व्यापक समुंद्री रणनीति पर बोलदे होई आतंकवाद , समुंद्री डकैती-तस्करी ते गैर कनूनी ढंग कन्ने मच्छी फगड़ने जनेई चुनौतियें दा जिक्र कीता। उनें प्रधानमंत्री मोदी हुंदी महासागर पहल दे मताबक निगरानी, तुरत प्रतिक्रिया, इलाकाई कूटनीति, कुल संसारी सहयोग ते बुनियादी ढांचे दे विकास समेत भारत दे एकीकृत दृष्टिकोण दे बारे च दस्सेआ।

<><><><><><>

UK-Trade Talk

ब्रिटेन नै गजा च हालात माढ़े होने पर इस्राइल कन्ने बपार सरबन्धी गल्लबात गी मुअतल करी दिता ऐ ते इस्राइल दे राजदूत गी समन भेजेआ ऐ। ब्रिटेन नै वेस्ट बैंक कब्जाधारियें पर नमीं बंदशां लाने दी बी घोषणा कीती ऐ ब्रिटेन दे विदेश सचिव डेवि लम्मी होरें इस्राइल दी फौजी कार्रवाई गी नैतिक तौर पर गैर वाजिव दस्सेआ ऐ। उनें आखेआ जे मुल्खै आसेआ सहायता गी रोकने कन्ने इक बड़ा मनुक्खी संकट पैदा होई गेदा हा। इस्राइल नै ब्रिटेन दी आलोचना गी खारिज करी दिता ऐ।

<><><><><><>

IMD

भारती मौसम विभाग नै अज्ज कर्नाटक च समुंद्री ते घाटें आहले इलाकें च भारी बरखा दी पेशनगोई कीती ऐ। अज्ज असम, मेघालय, कोंकण, गोवा ते मध्य महाराष्ट्र च बड़ी भारी बरखा दी मेद ऐ। आंध्र प्रदेश, बिहार ते झारखंड च बी अज्ज भारी बरखा दा अनुमान जताया गेआ ऐ। मौसम विभाग नै उत्तराखंड, पंजाब, हरियाणा, चंडीगढ़ ते उत्तर प्रदेश च इस म्हीने दी 26 तरीक तगर अंधी झक्खड़ ते गरज कन्नै बरखा पौने दी पेशगोई कीती ऐ। उआं पच्छमी राजस्थान च औंदे शुक्रवार तगर गर्म लू चलने दा अनुमान जताया ऐ।

<><><><><><>

LG-Announcement

इक्क बड़डे फैसले तैहत उपराज्यपाल मनोज सिन्हा होरें आखेआ ऐ जे सरकार पाकिस्तान आसेआ कीती गेदी गोलाबारी च मारे गेदे लोकें दे परौआर दे इक्क नेइमे सदस्ये गी सरकारी नौकरी देग। उपराज्यपाल होरें एह गल्ल पुंछ दे अपने दौरें दरान आखी। पुंछ जाइयै एल.जी होरें होए दे नुकसान दा जायजा लाया। घायलें ते प्रभावित परौआरें कन्नै मलाटी कीती ते अधिकारियें कन्नै इक बैठक दी अध्यक्षता कीती। उनें तौले मुआवजा मिलने ते व्यक्तिगत ते सामुदायिक बंकर बनाने लेई इक विस्तृत योजना पेश करने दा निर्देश बी दितां उपराज्यपाल होरें इस गल्लै दी पुष्टि कीती ऐ जे केंद्र सरकार ते यू.टी प्रशासन दौनें गै पीडित तें उंदे परौआर कन्नै खड़ोते देन ते बन्ने आहले इलाकें च परतिय लोकें गी बसाना, चिकित्सा दी मदद ते सुरक्षा उपाएं लेई प्रतिबद्ध ऐ। श्री सिन्हा होरें जीएमसी राजौरी दा बी दौरा लाया ते घायलें कन्नै गल्लबात करियै उंदा हालचाल पुच्छेआ।

<><><><><><>

LG-Sindoor

उपराज्यपाल मनोज सिन्हा होरें अज्ज आखेआ जे ऑप्रेसन सिंदूर भारतीय फौज दी दलेरी ते रणनीतिक ताकत दी इक जींदी जागदी मसाल ऐ। भारती फौज दे इतिहास च इसी इक्क ऐतिहासिक क्षण करार दिंदे होई एल.जी होरें आखेआ जे इस ऑप्रेसन नै इक ऐसी मसाल पेश कीती ऐ जेदे कन्नै साबत होई गेआ ऐ जे पाकिस्तान आसेका कीती गेदी कुसै बी नापाक हरकत दा बनकदा परता दिता जाग। भारती जवानें दी बहादुरी गी सलाम करदे होई उन्दे शौर्य ते हिम्मत दी सराहना कीती। अपने पुंछ दे दौरें दौरान उनें सेना दे जवानें कन्नै बी गल्लबात कीती ते भारती सेना दे युद्ध कक्ष दा बी दौरा लाया।

<><><><><><>

School-JK

जम्मू-कश्मीर च सरकारी स्कूलें च पढ़ने आहले 13 लकख शा मते विद्यार्थियें गी शिक्षा दे अधिकार आहले कनू तैहत मुफ्त वर्दी ते कताबां थहोआ करदियां न। पैहली थमां अठमी जमात दे तकरीबन 8 लकख विद्यार्थियें गी वर्दी ते तीसरी थमां 5मीं जमात दे 5.5 लकख विद्यार्थियें गी मुफ्त कताबां दितियां जा'रदियां न। स्कूलें च 13 जहार 804 आया ते हेल्परें दी मदाद कन्नै 15 जहार शा मती प्री प्राइमरी कक्षा शुरू कीतियां गेइयां न। 1 जहार 350 स्कूलें च व्यवसायिक शिक्षा बी दिती जा'रदी ऐ जेदे कन्नै 1.34 लकख विद्यार्थियें गी बकख-बकख हुनर सिक्खने च मदद थहोग।

<><><><><><>

Announcement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 ब'रें दे बश्कार ऐ ते ओह कठुआ जिले दा रौहने आहला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 ब'रें दा तजुर्बा होना लोइचदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंधत लोइचदे उपकरणें वगैरा दा इस्तेमाल करना बी औना चाईदा। आवेदक जिला सदर दफतर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोइचदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू पिन कोड 180001 उप्पर 15 जून 2025 थवां पैहले-पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>

Pak Claim rejector

भारत नै खुजदार च होई दी घटना गी लेइयै पाकिस्तान आसेआ लाए गेदे बेबुनियाद इल्जामें गी खारिज करी दिता ऐ। विदेश मंत्रालय दे अधिकारिक प्रवक्ता श्री रंधीर जायसवाल हौरें मीडिया दे सुआलें दा परता दिंदे होई आखेआ जे इस घटना च भारत दी कोई शमूलियत नेई ऐ। उनें इस घटना च मरने आहलें लेई बसोस प्रगट कीता। उनें आखेआ जे पाकिस्तान कुल संसारी स्तरै पर आतंकवाद दे केंद्र दे तौरा पर जानेआ जंदा ऐ ते अपनी अंदरूनी नाकामियें

सवां ध्यान फरकाने लेई ओह् भारत पर इल्जाम लांदा ऐ। जायसवाल होरें आखेआ जे अंतरराश्ट्रीय समुदाय गी गुमराह करने दियां इस चाल्ली दियां कोशशां व्यर्थ न ते पाकिस्तान अपनी कमिये गी छपालने च कामयाब नेई होग।

<><><><><><>